

पत्रुससे भिबा डाच्छारेमला चिठी

चु चिठीला बारेरी पाङ्तोःमा

भिबा म्हि: येशूला मुल चेला पत्रुससे भिबा मुबा (१ पत्रुस १:१)। चु चिठी भिबाला लागिरी पत्रुसदा सिलाससे हो लबा मुबा (१ पत्रुस ५:१२)।

भिबा ग्ला: चु चिठी “बेबिलोन” शहरग्याम भिबा मुबा भिसी पाङ्बा मुला (१ पत्रुस ५:१३)। बाइबलला ल्हानान विद्वानगदेसे बेबिलोन शहर भिबा चा रोम शहर हिन्ना भिसी पाङ्मुला।

भिबा साल: ओस्पन ईश्वी संवत् ६०-६४ (विक्रम संवत् ११७-१२१) सालला गुडरी भिबा मुबा।

खाल्दा भिबा: एशिया अञ्चलला न्हुपपट्टिला ग्लारीक्यार ससा बडबड तसी चिबा येशूदा विश्वास लबागदेदा भिबा मुबा।

चु चिठीरी विश्वास लबागदेदा “परमेश्वरसे धम्बा म्हिगदे” भिसी पाङ्बा मुला। चु चिठी भिबा चा चु चिठी पढब लबागदेसे आँट याङ्गै भिसी हिन्ना। तिगदा भिसम ख्रीष्टदा विश्वास लबासे लमा थेनीगदे दुख नासी चिबा मुबा। चुहङ् लसी आँट पिन्मा पत्रुससे थेनीगदेदा येशू ख्रीष्टला बारेरी थार्बा पिन्बा समाचार, येशू सिबादेन सिबाग्याम सोबा ताम ओच्छे येशू दोःसी फेप्खला भिबा कबुल ढन्ना लबा मुला। थेनीगदेसे याङ्बा दुख चा थेनीगदेसे लबा विश्वासदा कोङ्बा स्होबा ताम हिन्ना। ओच्छे थेनीगदेसे ख्रीष्ट फेप्खबा धिनरी इनाम याङ्ला भिसी ढुक्क तसी थे दुख नातोःला भिसी पाङ्बा मुला।

पत्रुससे चु चिठी पढब लबागदेदा दुखला धुडरी आँट पिन्बान ख्रीष्टला म्हिगदे हङ्बान दोसी भ्रउ भिसी बिन्ती लबा मुला।

मुल तामगदे

- फ्याफुल्बा १:१-२
- खाइमै आसिबा आश १:३-१२
- तिगै दोष आरेबा म्हि दोगो १:१३-२:१०
- दुखला धुइरी ख्रीष्टदा विश्वास लबागदेसे लतो:बा गे २:११-४:१६
- ख्रीष्टदा विश्वास लबागदे सोजो तसी लतो:बा गे ५:१-११
- चिठीला थुमरी भ्रिबा ताम ५:१२-१४

पत्रुससे भिबा डाच्छारेमला चिठी

१ लास्सो, पोन्टस, गलातियादेन कापाडोकिया ओच्छे एशियादेन बिथिनिया भिबा ग्लारी^१ क्यार यासी ससा बडबड तसी परदेशी दोसी चिबा परमेश्वरसे धम्बा म्हिगदेदा डा येशू ख्रीष्टला मुल चेला पत्रुसग्याम फ्याफुल्ला।

२ परमेश्वर आबासे डाच्छाहेन्सेन म्हन्बा अन्छार थेला आत्मासे एनीगदेदा हाडलान म्हि स्होबारी धम्बा मुला। थेतबासेलमा एनीगदेसे येशू ख्रीष्टसे कुल्बा ताम ड्यानै भिसी एनीगदेदा थेला काग्याम तिगै दोष आरेबा म्हि स्होबा मुला।

एनीगदेदेन छ्याम परमेश्वरला दयामायादेन शान्ति ल्हानान तगै।

खाइमै आसिबा आश

३ यहाडला प्रभु येशू ख्रीष्टला आबा परमेश्वरला जयजयकार तगै। तिगदा भिसम परमेश्वरसे येशू ख्रीष्टदा सिबाग्याम सोना लसी यहाडदा ल्हानान दया लबासे लमा यहाडसे

छार जुनी याड्बा मुला। दान्दे यहाडदेन छ्याम खाइमै आसिबा आश मुला।^४ थेहड् लसीन एनीगदेला लागिरी परमेश्वर आबासे खाइमै नाश आतबा, म्हासी आनिबा, न्होड्सी आनिबा मोलमगदे स्वर्गरी ठीक लसी थान्बा मुला।^५ ओच्छे एनीगदेसे लबा विश्वासग्याम परमेश्वरला शक्तिसे एनीगदेदा थाना लबाला लागिरी जोगब लसी थान्ना। चु ताम चा एनीगदेसे परमेश्वरसे निसाफ लबा धुइरी म्राड्ला।

६ दान्दे एनीगदेसे तिगै धिनना लागिरी ल्हानान थरीला दुख नातो:सै जमा धुइरी एनीगदे ताड्ला।^७ एनीगदेसे चुहड् लसी दुख नाबा चा एनीगदेसे लबा विश्वास सत्य हिन्ना भिसी उन्बाला लागिरी हिन्ना। नाश तसी निबा म्हरदा मी म्हर हिन्ना कि आहिन भिसी था याड्बाला लागिरी मेरी खाड्मुला भिसम एनीगदेला विश्वास मी थे म्हर भन्दा घेन हिन्ना। थेहड्बा विश्वाससे लमा येशू ख्रीष्ट

१:१ पोन्टस, गलातियादेन कापाडोकिया ओच्छे एसियादेन बिथिनिया भिबा ग्लागदे डाच्छा रोम यहुल्सारी परब तमुबा। तर दान्दे चा चु जम्मान ग्लागदे टर्की भिबा यहुल्सारी परब तमुला।

दोःसी फेप्खमा एनीगदे उदेक तला।
जमा धुइरी एनीगदेसे थेदेन छ्यामनोन
मानदेन इज्जत याङ्ला, ओच्छे
एनीगदेदा ज्यबा म्हि भिसी पाङ्ला।

८ एनीगदेसे येसू ख्रीष्टदा
आम्राङ्सैनोन माया लबा मुला।
दान्दे एनीगदेसे थेदा आम्राङ्सैनोन
विश्वास लबा मुला। ओच्छे
एनीगदे गाते ताङ्ला भिबा तामदेन
एनीगदेसे परमेश्वरदा गाते मानदेन
जयजयकार लला भिबा ताम खालैसेन
पाङ्बारी आखम। ९ एनीगदेसे लबा
विश्वासग्याम याङ्बा इनाम चा
एनीगदे थार्बा हिन्ना।

१० परमेश्वरसे एनीगदेदा लबा
दयामायाला बारेरी अगमवक्तागदेसे
डाच्छान पाङ्सी जिन्बा मुबा। ओच्छे
एनीगदेसे याङ्बा चु थार्बाला बारेरी
थेनीगदेसे ल्हानान ड्योइबा छार्बा
लमुबा। ११ थे अगमवक्तागदेसे चु
खाहङ् लसी तला, खाइमा तला भिसी
ड्योइबा छार्बा लमुबा। थेतबासेलमा
थेनीगदेदा ख्रीष्टला आत्मासे^१ डाच्छा
थार्बा पिन्बा ख्रीष्टसे दुख नातोःला,
ओच्छे थेसे दोःसी ल्हानान मान
याङ्ला भिबा ताम डाच्छान पाङ्सी
जिन्बा मुबा। १२ अगमवक्तागदेसे थे
धुइरी पाङ्बा ताम हाडला लागिरी
आहिन, तर एनीगदेलान लागिरी
पाङ्बा हिन्ना भिसी परमेश्वरसे

थेनीगदेदा घोना लमुबा। चु ताम
स्वर्गग्याम पुइखबा परमेश्वरला
आत्माग्याम पाङ्बागदेसे दान्दे
एनीगदेदा थार्बा पिन्बा समाचार थेःना
लबा मुला। चु ताम स्वर्गदूतगदेसेनोन
च्याबारी ल्हानान सेम लमुला।

तिगै दोष आरेबा म्हि दोगो

१३ थेतबासेलमा एनीगदेसे हाडला
सेमदा तहरी थान्सी तयार तउ। ओच्छे
सोजो तसी येसू ख्रीष्ट दोःसी फेप्खबा
धुइरी एनीगदेदा गाते दयामाया लला
भिबा तामरी पूरान आश लसी चिउ।
१४ एनीगदे कुल्बा ताम ड्यान्बा
कोलागदे तबासे लमा एनीगदेसे
डाच्छा आसेना आघोना हाडला
सेमसे म्हाइबा जम्मान आज्यबा
तामगदे रूलागो। १५ एनीगदेदा धम्बा
परमेश्वर तिगै दोष आरेबा परमेश्वर
हिन्ना। थेतबासेलमा एनीगदेला
जम्मान तामगदेएनोन परमेश्वरला
डाच्छा तिगै दोष आरेबा ततोःला।
१६ तिगदा भिसम परमेश्वरला बचनरी
चुहङ् भिसी भिबा मुला, “एनीगदे
तिगै दोष आरेबा म्हि दोगो, तिगदा
भिसम डा तिगै दोष आरेबा परमेश्वर
हिन्ना।”*

१७ खालैलान ली च्यासी आहिन, तर
म्हिसे लबा गे अन्धार निसाफ लबा
परमेश्वरदा एनीगदेसे आबा भिसी

१:११ चु पदरी “ख्रीष्टला आत्मा” पाङ्बा चा परमेश्वरला आत्मा भिबा हिन्ना।

१:१६ लेवी ११:४४-४५; १६:२

प्रार्थना लबासे लमा जम्बुलिङरी
परदेशी दोसी चितेधोना एनीगदे
परमेश्वर म्राङ्सी लोङ्गो। १८तिगदा
भिसम आखे म्हेमेहेन्से तेन्सी खबा
गे आखेल्बा रिमठिमग्याम एनीगदेदा
फेबाला लागिरी परमेश्वरसे गाते
ल्हानान पापला सय फाजी भिबा
ताम एनीगदेदा थानोन मुला। थे सय
चा नाश तसी निबा म्हर म्हुङ्ग्याम
फाबा सय हङ्बा आहिन। १९तर
ग्लुसीन ग्लुबारी आखम्बा ख्रीष्टला
काग्याम एनीगदेला पापला सय फासी
एनीगदेदा थाना लबा हिन्ना। ख्रीष्ट
बलि पिन्बा तिगै दोषदेन दाग
आरेबा ग्यु बोगो हङ्बान दोजी।
२०चुला लागिरी परमेश्वरसे ख्रीष्टदा
जम्बुलिङ स्होबा भन्दा डाच्छान
धम्बा मुबा। तर चु लिच्छाला धुङ्गी†
एनीगदेला लागिरी ख्रीष्ट फेप्खजी।

२१ख्रीष्ट येशूग्यामसेन एनीगदेसे
परमेश्वरदा विश्वास लबा हिन्ना।
थेनोन परमेश्वरसे ख्रीष्ट येशूदा
सिबाग्याम सोना लसी जम्मान भन्दा
घेन मान पिन्जी। थेतबासेलमान
एनीगदेसे परमेश्वरथोरी विश्वासदेन
आश लमुला।

२२दाहेन्से एनीगदेसे सत्य ताम
ङ्यान्सी ह्वाङला सेम चोखो स्होबा
मुला। थेतबासेलमा एनीगदेसे

ह्वाङला ज्योज्यो आले नाना आडादा
चोखो माया लमुला। ओच्छे गिकसेम
गिकदाएनोन सेमहेन्सेन चोखो माया
लउ। २३तिगदा भिसम एनीगदेसे
खाइमै नाश आतबादेन छोन्बो
परमेश्वरला बचनग्याम नाश तसी
निबा आहिन, तर नाश आतबा छार
जुनी याङ्बा मुला। २४तिगदा भिसम
परमेश्वरला बचनरी चुहङ् भिसी
भ्रिबा मुला,

“जम्मान म्हिगदे छे हङ्बान

हिन्ना,

ओच्छे थेनीगदेला मानदेन जेबा

हिरी खबा छेला म्हेन्दो हङ्बा
हिन्ना।

छे हेला ओच्छे म्हेन्दो ताइला।

२५तर प्रभुला बचन जुकजुकधोनान
चिला।”*

दान्दे एनीगदेदा थेःना लबा थार्बा
पिन्बा समाचार चु बचननोन हिन्ना।

२ थेतबासेलमा एनीगदेसे
जम्मान आज्यबा ताम, छल
लबा, सेमरी पाप ताम थान्बा, डाह
लबादेन स्थान्दोला तामगन लबा चु
जम्मान ताम रूलागो। २लैनु कोलासे
ङ्हे थुङ्बारी म्हाइबा हङ् लसी
एनीगदेसे चा परमेश्वरला सत्य
बचनदा म्हाइगो। तिगदा भिसम चु
बचनग्यामसेन एनीगदे ह्वाङसे याङ्बा

१:२० “लिच्छाला धुङ्” भिबा चा डाच्छा ख्रीष्ट फेप्खमाहेन्से दोःसी फेप्खबा धुङ्धोनादा
पाङ्बा हिन्ना।

१:२४-२५ यशै ४०:६-८

थार्बारी ल्हेबान निला। ३प्रभुसे गाते
ल्हाना दया लबा मुला भिबा ताम
एनीगदेसे था याङ्सी जिन्बा मुला।*

४एनीगदे येशू मुबा ग्लारी खबान
मुला, थे चा छोन्बो युडबा हिन्ना।
थेदा म्हिगदेसे गे आखेल्बा युडबा
भ्याङ्बा हङ् लसी भ्याङ्मुबा। तर
परमेश्वरसे थेदा धम्सी ग्लुसीन
ग्लुबारी आखम्बा युडबा स्होजी।
५एनीगदेएनोन छोन्बो युडबा हङ्बान
हिन्ना, परमेश्वरसे एनीगदेदा हाडला
मन्दिर स्होबा मुला। परमेश्वरला
लागिरी फेसी थान्बा पूजा लबा
म्हिगदे दोःसी येशू स्त्रीष्टग्याम एनीगदे
परमेश्वरदा सेम निबा आत्मा
बलि फुल्बा म्हि दोबा मुला। ६तिगदा
भिसम परमेश्वरला बचनरी चुहङ्
भिसी भिबा मुला,

“च्यागो, डाङ् ग्लुसीन ग्लुबारी
आखम्बा सुर युडबा धम्सी
सियोन^१ भिबा ग्लारी थान्बा
मुला।

जुन म्हिसे थेदा विश्वास लला
थे म्हि खाइमै पेःआतोः।”*

७थेतबासेलमा विश्वास लबागदेला
लागिरी येशू स्त्रीष्ट ग्लुसीन ग्लुबारी
आखम्बा युडबा दोजी। तर विश्वास
आलबागदेला लागिरी चा बचनरी
भिबा चु ताम ढिक्मुला,

“जुन युडबा दिम स्होबा म्हिगदेसे
गे आखेल्बा युडबा भिसी
भ्याङ्जी,

थेनोन युडबा चा दिमला सुर
युडबा दोजी।”*

८ओच्छे

“म्हिगदेदा तोइबा युडबा चुनोन
हिन्ना।

ल्हानान म्हिगदे तोइसी
पाप्ला।”

परमेश्वरसे कुल्बा तामरी विश्वास
आलबासे लमान थेनीगदे पाप्ला।
थेनीगदे चुहङ् तबा चा परमेश्वरसे
म्हन्बा अन्छारनोन हिन्ना।*

९तर एनीगदेदा धोपधोपग्याम
हाडला उदेकला य्हालरी भबा
परमेश्वरसे थेला उदेकला गे स्थान्दो
म्हिगदेदा पाङ्बाला लागिरी एनीगदेदा
थेसे धम्बा म्हि, जम्मानथोरी शासन
लबा परमेश्वरला मन्दिररी पूजा लबा
म्हि, ओच्छे परमेश्वरला लागिरी जे
फेसी थान्बा य्हुलदेन हाडलान सन्तान
स्होजी।*

१०डाच्छा एनीगदे परमेश्वरला
सन्तान आहिन्मुबा।

तर दान्दे एनीगदे परमेश्वरला
सन्तान दोबा मुला।

डाच्छा एनीगदेसे दया
आयाङ्मुबा।

२:६ “सियोन” भिबा चा यरूशलेम हिन्ना।

२:३ भजन ३४:८ २:६ यशै २८:१६ २:७ भजन ११८:२२ २:८ यशै ८:१४-१५

२:६ प्रस्था १६:५-६; यशै ४३:२०-२१; व्यव ४:२०; ७:६; १४:२; तीत २:१४; यशै ६:२

तर दान्दे एनीगदेसे दया याङ्बा मुला।*

परमेश्वरदा तेन्बा म्हि

११ डाला सेम निबा होगदे, एनीगदे चु जम्बुलिङला लागिरी विदेशीदेन परदेशी हिन्ना। थेतबासेलमा एनीगदेदा न्होङ्ना लबारी, सेमसे लबारी म्हाइबा आज्यबा गेगदे थालउ भिबा डाला बिन्ती मुला। १२ ओच्छे ख्रीष्टदा विश्वास आलबा म्हिगदेला गुडरी एनीगदेला बानीबेहोर ज्यबा तगै। तिगदा भिसम खालैसे एनीगदेदा बिरोध लसी आज्यबा ताम पाङ्सैनोन एनीगदेसे लबा ज्यबा गेगदे थेनीगदेसे म्हाङ्ला। चुहङ् लजी भिसम ख्रीष्ट निसाफ लबारी फेप्खबा धुडरी थेनीगदेसे एनीगदेला ज्यबा बानीबेहोर म्हाङ्सी परमेश्वरला मानदेन जयजयकार लला।

शासन लबागदेदेन मालिकगदेला तहरी चिउ

१३ म्हिगदेसे यहुल्सा चलब लबारी स्होबा रिमठिम मुसैनोन जम्मान भन्दा घेन ग्ले मुसैनोन प्रभुला लागिरी एनीगदे थेनीगदेला तहरी चिउ। १४ थेहङ् लसीन यहुल्सा चलब लबा म्हिगदेला तहरीनोन चिउ। तिगदा भिसम आज्यबा गे लबागदेदा सजाय

पिन्बारीदेन ज्यबा गे लबागदेदा मान पिन्बारी परमेश्वरसेन थेनीगदेदा धम्बा हिन्ना। १५ तिगदा भिसम एनीगदेसे लबा ज्यबा गे म्हाङ्सी मूर्ख म्हिगदेसे आघोना पाङ्बा आतोःबा तामगदे ख्लागै भिसी परमेश्वरसे म्हन्बा मुला। १६ थेतबासेलमा एनीगदे खालैला नोकर तबा हङ् लसी थाभ्रउ, तिगदा भिसम परमेश्वरसे एनीगदेदा थाना लबा मुला। तर परमेश्वरसे थाना लजी भिदेमा आज्यबा गे चा थालउ। बरु परमेश्वरदा तेन्बा म्हिगदे हङ् तसी भ्रउ। १७ ओच्छे जम्मान म्हिगदेदा मान लउ। थेहङ् लसीन येशू ख्रीष्टदा विश्वास लबा ज्योज्यो आले नाना आडागदेदा माया लउ। ओच्छे परमेश्वर म्हाङ्सी लोङ्गो। ग्लेदाएनोन मान लउ।†

ख्रीष्टसे हङ् लसीन दुख नागो

१८ नोकरगदे, एनीगदेसे हाङ हाङला मालिकगदेदा मान लसी थेनीगदेला तहरी चिउ। एनीगदेदा दया लबा मालिकगदेदा जे आहिन, तर दया आरेबा मालिकगदेदाएनोन मान लउ। १९ खालै म्हिसे हाङसे नाआतोःबा दुख परमेश्वरसे म्हन्बा ताम ढन्सी नाजी भिसम थे म्हाङ्सी परमेश्वर ताङ्ला। २० तिगदा भिसम एनीगदेसे आज्यबा गेरी दुख नासी तिग याङ्ला?

२:१७ “ग्ले” भिबा चा शासन लबा म्हि हिन्ना।

२:१० होशे २:२३

तर एनीगदेसे ज्यबा गे लसीनोन दुख
नाजी भिसम एनीगदे परमेश्वरला
डाच्छा ज्यबा म्हि दोला। ^{२१}चुलान
लागिरी परमेश्वरसे एनीगदेदा धम्बा
हिन्ना। तिग्दा भिसम ख्रीष्टसेनोन
एनीगदेला लागिरी दुख नासी उन्जी।
थेतबासेलमा एनीगदेएनोन ख्रीष्टसे
उन्बा ग्यामरी भ्रबारी तयार ततोःला।

^{२२}“थेसे तिगै पाप आलनी,

ओच्छे थेसे खालैदा छलएनोन
आलनी।”*

^{२३}म्हिगदेसे जस्तोन हेला लसैनोन
ख्रीष्टसे थेनीगदेदा हेला
आलनी।

ओच्छे जस्तोन दुख पिन्सैनोन
थेसे खालैदा तिगै आलनी।

तर थेसे खालैला ली
आच्याना ठीक निसाफ लबा
परमेश्वरथोरी भर लजी।*

^{२४}य्हाडसे पाप लबा ख्लासी
परमेश्वरदा सेम निबा म्हि दोगै
भिसी

ख्रीष्टसे य्हाडला जम्मान पाप
हाडलान लहुडरी पुडसी
कुसरी टांगब लजी।

थेनोन ख्रीष्टला घाउगदेग्याम
एनीगदे खम्बा मुला।*

^{२५}डाच्छा एनीगदे गोठालो आरेबा
ग्युगदे हङ्गनोन ससा बडबड
तबा मुबा।

तर दान्दे एनीगदे हाडला
आत्मादा वास्ता लबा
गोठालो मुबा ग्लारी दोःसी
खबा मुला।*

म्रिडदेन हेम्बोसे लोप्तोःबा ताम

^३थेहङ् लसीन म्रिडम्हेमेगदे,
एनीगदे हाड हाडला हेम्बोला
तहरी चिउ। चुहङ् लजी भिसम
एनीगदेसे प्रभुला बारेरी तिगै ताम
आपाङ्सैनोन एनीगदेला ज्यबा
बानीबेहोरसे लमा परमेश्वरला बचन
आङ्यान्बा हाड हाडला हेम्बोला
सेम ढाला।* ^२तिग्दा भिसम
एनीगदेसे लबा मानदेन एनीगदेला
चोखो बानीबेहोर थेनीगदेसे म्राङ्गला।
^३एनीगदे म्हिदा उन्बाला लागिरी म्हर
म्हुइदेन ज्यबा ज्यबा क्वान क्वान्सी
क्रा स्होसी ज्योसी थाभ्रउ।* ^४बरु
एनीगदेला सेमरी चा खाइमै नाश
आतबा ज्यबा शीलस्वभाव थोबादेन
सोजो तसी चिउ। चु चा परमेश्वरला
डाच्छा ल्हानान ज्यबा ताम हिन्ना।
^५तिग्दा भिसम परमेश्वरथोरी आश
थान्सी परमेश्वरदा तेन्बा डाच्छा
डाच्छाला म्रिडम्हेमेगदेएनोन हाड
हाडला हेम्बोला तहरी चिसी चुहङ्
लसीन ज्योमुबा। ^६सारासे खाहङ्
लसी हाडला हेम्बो अब्राहामदा
मालिक भिसी थेसे कुल्बा ताम

२:२२ यशै ५३:६ २:२३ यशै ५३:७ २:२४ यशै ५३:५ २:२५ यशै ५३:६

३:१ एफि ५:२२; कल ३:१८ ३:३ १ तिमो २:६

इयान्मुबा। थेहङ् लसीन एनीगदेसे
हाङला हेम्बो म्राङ्सी आलोङ्ना
ज्यबा लजी भिसम एनीगदे सारालान
भामेगदे दोला।*

७ थेहङ् लसीन हेम्बोसेनोन जम्मान
म्हि साप्राला ताङ हङ्बान कमजोर
मुला भिबा ताम घोड। थेतबासेलमा
हाङला म्रिङदा हाङ भन्दा कमजोर
म्हन्सी मान लउ। तिग्दा भिसम
परमेश्वरला दयामायग्याम याङ्बा
जुनीरी थेनी गिकनोन हिन्ना।
थेतबासेलमा प्रार्थना लमा तिगै तामसे
रोकब थालगै भिसी गिकसेम गिकदा
ज्यबा व्यवहार लउ।*

ज्यबा गे लमा नातोःबा दुख

८ दाहेन्से एनीगदे जम्मान सेम गिक
तसी चिउ। ओच्छे स्थान्दोदा तबा
दुख हाङदान तबा हङ्बान म्हन्गो,
हाङला ज्योज्यो आले नाना आडादा
हङ् लसी माया लउ ओच्छे सोजो
तसी चिबादेन ज्यबा बानीबेहोर थोगो।
९ खालैसे आज्यबा लसैनोन एनीगदेसे
थेनीगदेदा आज्यबा थालउ। ओच्छे
केःबागदेदा एनीगदेसे थाकेःगो।
बरु थेनीगदेदा मोलम पिन्गो। तिग्दा
भिसम एनीगदेसे मोलम याङ्गै भिसी
परमेश्वरसे एनीगदेदा इयोइबा हिन्ना।
१० तिग्दा भिसम परमेश्वरला बचनरी
चुहङ् भिसी भिबा मुला,

“जुन म्हिसे हाङला लहुइदा माया
लबादेन

सुखला धिन च्याबा सेम लला
थेसे पाप तामदेन लुसीला ताम
पाङ्बा ख्लातोःला।

११ थेसे आज्यबा गे लबा ख्लासी

ज्यबा गे लगै,
ओच्छे शान्ति म्हाइसी शान्तिलान
लागिरी गे लगै।

१२ तिग्दा भिसम प्रभुसे म्हन्बा

अन्छारला गे लबा म्हिदा
वास्ता लसी
थेनीगदेला प्रार्थना सान्मुला।

तर आज्यबा गे लबागदेदा

परमप्रभुसे बिरोध लमुला।”*

१३ चुदे एनीगदेसे ज्यबा गे लबा
सेम मुजी भिसम एनीगदेदा खाल्से
न्होङ्ना लला? १४ तर ज्यबा गे
लमाएनोन दुख नातोःजी भिसम
परमेश्वरग्याम एनीगदेसे मोलम
याङ्ला। थेतबासेलमा एनीगदे खालै
म्राङ्सी लोङ्आतोः, ओच्छे सुर्दाएनोन
लआतोः। १५ बरु ख्रीष्टदा प्रभु हिन्ना
भिसी एला सेमहेन्सेन थेदा मान लउ।
ओच्छे एनीगदेसे लबा आशला बारेरी
खालै म्हिसे इयोइजी भिसम पाङ्बारी
सदन तयार तसी चिउ।* १६ तर
थेनीगदेदा पाङ्बा धुइरी सोजो तसी
थेनीगदेदा मान लसी पाङ्गो। ओच्छे
एनीगदेला सेमदा सदन चोखो थान्गो।

थेहङ् लजी भिसम एनीगदेसे ख्रीष्टदा विश्वास लबासे लमा याङ्बा ज्यबा बानीबेहोर म्राङ्सी एनीगदेदा बिरोध लसी हेला लबागदे हाङनोन पेःला।
 १७ चुदे परमेश्वरसे चुहङ्बान म्हन्बा मुसम आज्यबा गे लसी दुख नाबा भन्दा मी ज्यबा गे लसी दुख नाबान ज्यबा हिन्ना।

१८ तिग्दा भिसम यहाङला पापला लागिरी ख्रीष्ट तिरेम सदनना लागिरी दुख नासी सिजी। थेसे खाइमै पाप आलनी, तर पापीगदेदा परमेश्वर मुबा ग्लारी भोर्बारी सिजी। थे ल्हुइरी सिसी निसै थेदा परमेश्वरसे आत्माारी सोना लजी।†

१९ थेनोन आत्मााला शक्तिरी ख्रीष्ट फेप्सी च्युप्सी थान्बा आत्मागदेदाएनोन थार्बा पिन्बा समाचार थेःना लजी। २० थे आत्मागदे चा ओन्मा नोआ भिबा म्हिसे पानी जहाज स्होबा धुइरी हाङ हाङला पाप ख्लासी हाङ मुबा ग्लारी खला वा भिसी परमेश्वरसे भ्रान्सी चिबा म्हिगदे मुबा। तर थेनीगदेसे परमेश्वरसे कुल्बा ताम आङ्यान्नी। थेतबासेलमा पानी जहाजरी मुबा म्हि भ्रेजे नामदेन भालग्याम जोगब तजी।*
 २१ थे नामदेन भाल चा बप्तिस्माला चिनु हिन्ना। चु बप्तिस्मा चा ल्हुइला

खिदि भ्याङ्बारी नुहाब लबा हङ्बा आहिन, तर यहाङला सेम चोखो स्होबाला लागिरी परमेश्वरसे यहाङदेन छ्याम लबा कबुल हिन्ना। येशू ख्रीष्ट सिबाग्याम सोबासे लमा बप्तिस्मा चा एनीगदे थार्बाला चिनु हिन्ना। २२ येशू ख्रीष्ट स्वर्गरी फेप्जी, ओच्छे स्वर्गदूतगदे, शासन लबागदेदेन शक्तिगदेदा हाङला तहरी थान्सी परमेश्वरला दाहिने छ्यापट्टि मुबा ठिरी धन्छ्याबा मुला।

परमेश्वरला लागिरी सोउ

४ थेतबासेलमा ख्रीष्टसे खाहङ् लसी ल्हुइरी दुख नाजी एनीगदेएनोन थेहङ्बान दुख नाबारी तयार तउ। तिग्दा भिसम जुन म्हिसे ल्हुइरी दुख नाला थेसे पाप लबा ख्लााला। २ दाहेन्से थे म्हि थेसे म्हन्बा आज्यबा ताम अन्छार आहिन, तर चु ल्हुइ सोतेधोना परमेश्वरसे म्हन्बा अन्छार भ्रला। ३ डाच्छा मी एनीगदे परमेश्वरदा डोआसेबा म्हिगदे हङ्बान स्थान्दोदेन छ्याम ब्रेल्सी भ्रबा, सेमरी जे लइ म्हन्बा थेनोन लसी भ्रबा, ड्य्होइबा स्हे थुङ्सी मोजमजा लसी भ्रबादेन मूर्तिदा परमेश्वर भिसी ल्हानान पूजा लसी नइबा खबा गे लसी भ्रजी।

३:१८ “पापीगदे” भिबा चा ख्रीष्टदा बिरोध लसी हेला लबा म्हिगदे हिन्ना (१ पत्रुस ३:१६ स्हीगो)।

३:२० उत्प ६:१-७:२४

४ ख्रीष्टदा विश्वास आलबागदे दान्दे एनीगदेसे थेनीगदेदेन छ्याम आज्यबा गे आलबा म्राङ्सी उदेक तबा मुला। ओच्छे एनीगदेला बिरोध लमुला। ५ तर सोबागदेदेन सिबागदेला निसाफ लबारी तयार तसी धन्छ्याबा परमेश्वरदा थेनीगदेसे हाङ हाङसे लबा गेला हिसाब उन्तोःला। ६ थेतबासेलमान सिबागदेदा थार्बा पिन्बा समाचार थेःना लबा हिन्ना। जम्बुलिङरी मुबा स्थान्दो म्हिगदेदा हङ्गोन सिबा म्हिगदेदाएनोन लहुङरी मुबा धुङरी निसाफ लबा मुबा। तसैनोन आत्मारी परमेश्वर हङ्ग लसीन सोगै भिसी सिबागदेदाएनोन थार्बा पिन्बा समाचार थेःना लबा हिन्ना।

७ जम्मान ताम नाश तबा धुङ खसी जिन्बा मुला। थेतबासेलमा एनीगदे प्रार्थना लबाला लागिरी हाङला सेम खीसी होशियार तसी चिउ। ८ जम्मान भन्दा घेन ताम चा हाङ हाङ न्हङरी सेमहेन्सेन माया लसी ढिक्सी चिबा हिन्ना। तिग्दा भिसम मायासे ल्हानान थरीला पापगदे माफ लमुला। ९ एनीगदेसे हाङ हाङला दिमरी खबा डोन्बोदा आछेर्ना क्योङ्गो।

१० एनीगदेसे परमेश्वरला दयामाया-ग्याम थरी थरीला मोलमगदे याङ्बा मुला। एनीगदेसे थे मोलम अन्छार गिकसेम गिकला लागिरी गे लउ।*

११ चुदे खालैसे ताम पाङ्बा मोलम याङ्बा मुसम थेसे परमेश्वरसे पाङ्बा अन्छार पाङ्गै, चुदे खालैसे हो लबा मोलम याङ्बा मुसम थेसे परमेश्वरसे पिन्बा शक्तिग्याम हो लगै। थेतबासेलमा जम्मान तामदेन येशू ख्रीष्टग्याम परमेश्वरला मानदेन जयजयकार तगै। थेदा सदन जम्मान मानदेन जयजयकार ओच्छे शक्ति तगै। आमेन।

ख्रीष्टदा विश्वास लबासे लमा तबा दुख

१२ डाला सेम निबा होगदे, ल्हानान दुख तबा धुङरी चु खाइमै आतबा ताम तजी भिसी उदेक थाम्हन्गो। तिग्दा भिसम चु चा एनीगदेला विश्वास खाहङ्बा मुला भिसी च्याबा हिन्ना। १३ बरु ख्रीष्टसे नाबा दुख यहाङसेनोन नाम्याङ्जी भिसी ताङ्गो। तिग्दा भिसम ख्रीष्टला घेन शक्ति म्राङ्मा एनीगदे ल्हानान ताङ्म्याङ्गला। १४ चुदे ख्रीष्टदा विश्वास लबासे लमा खालैसे एनीगदेला बेइज्जत लजी भिसम एनीगदेसे हाङ परमेश्वरग्याम मोलम याङ्बा म्हि भिसी म्हन्गो। तिग्दा भिसम परमेश्वरला आत्मा ला घेन यहालदेन शक्ति एनीगदेदेन छ्याम तला। १५ तर म्हि साइबा, यहो लबा, आज्यबा गे लबादेन म्हिला गेरी या भाङ्बा म्हिगदेसे नाबा हङ्बा दुख

एनीगदे न्हडरी खालैसेन थानागो।
 १६तर खालैसे ख्रीष्टियान तबासे
 लमा दुख नामुला भिसम थापे:गो।
 बरु ख्रीष्टला लागिरी दुख नाम्याङ्जी
 भिसी परमेश्वरला जयजयकार लगै।
 १७तिगदा भिसम निसाफ लबा धुइ तसी
 जिन्बा मुला, परमेश्वरसे निसाफ लमा
 डाच्छा हाडलान म्हिगदेला लला।
 चुदे य्हाडदान डाच्छा निसाफ लबारी
 चुला भिसम परमेश्वरला समाचार
 थे:सीनोन विश्वास आलबागदेला
 गति खाहङ्बा तला? १८परमेश्वरला
 बचनरी चुहङ् भिसी भिबा मुला,

“परमेश्वरला डाच्छा ज्यबा म्हिदा
 मी थाना लबारी चुहङ्बा गाहो
 मुला भिसम
 परमेश्वरदा आतेन्बादेन पापी
 म्हिगदेला गति भन खाहङ्बा
 तला?”*

१९थेतबासेलमा परमेश्वरसे म्हन्बा
 अन्छार दुख नाबागदेसे ज्यबा गे
 लबारी थाखलागो। ओच्छे हाडला
 आत्मा जम्मान स्हे स्होबा विश्वास
 लखम्बा परमेश्वरदा जिम्मा पिन्गो।

**मण्डलीदा च्याबा म्हिगदेदेन
 भ्योनगदेसे लोप्तो:बा ताम**

५ थेतबासेलमा एनीगदे न्हडला
 मण्डलीदा च्याबा म्हिगदेदा
 डाइ चु बिन्ती लला। तिगदा भिसम
 डाएनोन ख्रीष्टसे नाबा दुख म्हाङ्बा

मण्डलीदा च्याबा म्हि हिन्ना। थेहङ्
 लसीन ख्रीष्ट दो:सी फेप्खमा थेसे
 याङ्बा य्हालदेन शक्ति डाइनोन
 याङ्ला। २परमेश्वरसे एनीगदेला
 विश्वासरी ख्लासी पिन्बा थेला
 म्हिगदेदा गोठालोसे ग्युगदेदा च्याबा
 हङ् लसी ज्यना लसी च्यागो। चु गे
 टाङ्गाला लोभदेन करसे आहिन,
 तर हाडला सेमहेन्से ताङ्सी ताङ्सी
 लउ। तिगदा भिसम चु परमेश्वरसे
 म्हन्बा ताम हिन्ना।* ३एनीगदेदा
 जिम्मा पिन्बा म्हिगदेदा एनीगदेसे
 हाडला तहरी थान्बारी थाम्हाङ्गो।
 तर एनीगदेसे डाच्छा थेनीगदेला
 लागिरी ज्यबा गे लसी उन्गो। ४थेहङ्
 लजी भिसम मुल गोठालो येसू ख्रीष्ट
 फेप्खमा एनीगदेसे खाइमै आन्होङ्बा
 भक्भक्बा मुकुट याङ्ला।

५थेहङ् लसीन भ्योन म्हिगदे
 गन्बागदेला तहरी चिउ। ओच्छे
 एनीगदे जम्मान हाड हाड न्हडरी
 सोजो तसी गिकसेम गिकला
 ताम ड्यानसी चिउ। तिगदा भिसम
 परमेश्वरला बचनरी चुहङ् भिसी
 भिबा मुला,

“परमेश्वरसे घमण्ड लबा
 म्हिगदेदा बिरोध लमुला,
 तर सोजो म्हिगदेदा दयामाया
 लमुला।”*

६थेतबासेलमा एनीगदे हाङ्नोन
 सोजो तसी परमेश्वरला घेन शक्तिला

तहरी चिउ। ओच्छे धुइ तमाहेन्से परमेश्वरसे एनीगदेदा म्हिगदेला गुडरी मान याङ्बा म्हि स्होला। जमाहेन्से एनीगदेसे मान याङ्ला।*
 ७ एनीगदेला जम्मान धन्दा सुर्दा परमेश्वरथोरी थान्गो। तिग्दा भिसम परमेश्वरसेन एनीगदेदा वास्ता लला।

८ तसैनोन एनीगदे सदन होशियार तसी छोर्सी चिउ। तिग्दा भिसम एनीगदेला शत्रु शैतान खाल्दा स्याप्ला थेदान चतोःला भिसी इहासी भ्रबा च्यानसे हङ् लसी म्हाइसी भ्रमुला।
 ९ थेतबासेलमा विश्वासरी कोङ्सी थे शैतानना बिरोध लउ। तिग्दा भिसम जम्बुलिङ नाङलान विश्वासीगदेसेनोन एनीगदेसे नाबा हङ्बान दुख नाबान मुला भिबा ताम एनीगदेदा थानोन मुला।

१० जम्मान दयामायासे प्लिङ्बा परमेश्वरसे एनीगदेदा ख्रीष्ट येशूदेन छयाम गिक स्होसी जुकजुकधोना चिबा हाङला यहालदेन शक्तिरी

इयोइबा मुला। एनीगदेसे तिगै धिन दुख नामाहेन्से परमेश्वरसेन एनीगदेदा पाको म्हि स्होला, ओच्छे एनीगदेला विश्वास कोङ्ना लला।
 ११ जम्मान शक्तिदेन शासन सदन परमेश्वरलान हिन्ना। आमेन।

चिठीला थुमरी भिबा ताम

१२ परमेश्वरला जम्मान सत्य दयामाया एनीगदेदा घोना लबारीदेन आँट पिन्बारी डाइ विश्वास लखम्बा आले सिलासदा चु चिठीरी जजाकी ताम भ्रिपुङ्बा हिन्ना। परमेश्वरला चु दयामायारी एनीगदे कोङ्सी चिउ।*

१३ एनीगदेदा हङ्नोन परमेश्वरसे धम्बा चु बेबिलोन भिबा शहररी† मुबा विश्वासीगदेदेन प्रभुरी डाला भा मर्कूससेनोन एनीगदेदा फ्याफुल्ला भिसी पाङ्बा मुला। १४ ओच्छे गिकसे गिकदा सेमहेन्से माया लसी फ्याफुल्गो। एनीगदे ख्रीष्टला म्हिगदे जम्मादान शान्ति तगै।*

५:१३ बाइबलला ल्हानान विद्वानगदेसे “बेबिलोन शहररी” भिबा चा रोम शहररी हिन्ना भिसी म्हन्मुला।

५:६ मत्ती २३:१२; लूका १४:११; १८:१४ ५:१२ मुल १५:२२, ४०

५:१२ मुल १२:१२, २५; १३:१३; १५:३७-३९; कल ४:१०; फिले २४